

## Awas! Agama Anjuran Syaitan

Pati ucapan al-Ustaz al-Sayyid Abi al-Hasan Ali al-Hasani al-Nadwi, Mudir Darul-Awam<sup>1</sup>, Nadwatul

Ulama, Lucknow, India: dan anggota al-Mujamma' al-Ilmi al-'Arabi Damsyik, yang tersiar di dalam majalah

“al-Ba‘thu al-Islāmī”

(Diterjemah oleh: Salahuddin Ali)

Dār al-‘Ulūm University Deoband - India

Dalam dunia kita hari ini telah timbul

berbagai-bagai gejala-gejala dan bermacam-macam aneka corak, yang

tiap-tiap satunya itu ada mempunyai nama yang tertentu,

seperti kehidupan cara timur, kehidupan cara

barat, kehidupan yang beraneka rupa kemewahan, dan

berbagai-bagai kehidupan cara lama. Jelasnya bermacam-macam nama

dan istilah. Tetapi hakikat sebenarnya kesemua itu

tidak lebih daripada dua bahagian sahaja. Pertama

kehidupan yang berputar di atas dasar memuja hawa nafsu.

Kedua kehidupan yang berdiri di atas asas menyembah

Allah. Ada pun yang selain daripada yang dua ini, adalah

merupakan cabang dan cawangan sahaja.

Yang dikatakan yang berputar di atas dasar

memuja hawa nafsu itu, ialah perjalanan hidup

seorang manusia mengikuti hawa nafsu dan

menurut khayalan-khayalan daripada syaitan, ini ialah kehidupan

yang merdeka dan lepas bebas dari sebarang ikatan.

Tentang kehidupan yang berdiri di atas asas menyembah Allah


dan iman itu pula ialah hidup seorang mukmin

yang beriman dengan Tuhan-Nya dan patuh dengan segala

hukuman dan kehendak-Nya serta berkeyakinan yang penuh bahawa

Allah Ta‘ālā mengetahui akan segala maslahah dan kehendak

dirinya, tidak ada di sebalik itu siapa-siapa pun yang lebih



mengetahui daripada-Nya. Dialah (Allah) yang menurunkan dasar-dasar

dan undang-undang hidup yang wajib kita beramal dan


menurutnya, kerana kehidupan yang tidak berdasarkan

undang-undang itu ialah hidup yang tidak betul.

Nabi-nabi tidak diutuskan melainkan untuk menyeru

sekalian manusia menyembah Tuhan Yang Maha Esa. Manakala

<sup>1</sup> Ejaan sebenar ialah Darul-Uloom



*Masjid yang indah ini ialah salah sebuah masjid di Timur Tengah.*

berjaya seruannya itu, menanglah penyembahan tuhan atas pujaan hawa nafsu. Tetapi pujaan hawa nafsu tidak akan hilang, segala kesan-kesannya itu tetap ada bila-bila masa pun. Malah dia akan timbul apabila ada peluang. Pada suatu masa segala kesan-kesannya itu akan kuat dan kelihatan nyata peranannya.

Kita merasa duka pujaan hawa nafsu

telah menguasai dalam zaman yang kita hidup di dalamnya ini dari segala jurusan. Tak ada satu jurusan yang tidak ditewaskannya. Sekarang dia telah menguasai di segala pelosok, baik di bandar mau pun di pejabat-pejabat

dan kilang-kilang. Seolah-olah satu alat pemutar yang aneh yang menelan tiap-tiap benda yang kecil dan besar, hingga pujaan hawa nafsu telah merupakan satu agama sebagaimana agama-agama yang lain juga. Ini bukanlah perkara baharu, malahan adalah satu perkara lama, yang banyak penyeru-penyeru dan pengikut-pengikutnya pada tiap-tiap zaman, walau sekalipun tidak diketahui tempatnya dalam istilah-istilah agama dan tidak didapati pengikut-pengikut di atas nama “al-dīn” (agama) tetapi pada hakikatnya ialah sebesar-besarnya agama, dalam menakluki dan menguasai tiap-tiap jiwa. Agama ini ada mempunyai penyeru-penyeru dan pengikut-pengikut lebih banyak daripada agama-agama lain. Apa yang tuan dengar hari ini, bahawa agama Kristian ada penganut-penganutnya, agama Islam ada pemeluk-pemeluknya, agama Hindu ada pengikut-pengikutnya, dengan angka bilangan yang besar, tetapi ini tidaklah sebagaimana yang telah tuan dengar dan lihat itu. Malahan bilangan yang kecil sahaja yang boleh dihitungkan menjadi pengikut-pengikut agama tersebut. Sebilangan besar daripada mereka itu ialah pengikut-pengikut agama pujaan hawa nafsu dan syaitan.

Adakah tuan mengetahui mengapakah begitu laris dan majunya jualan pujaan hawa nafsu dan apakah sebab yang menjadikan ia mendapat tempat dan sambutan di sisi manusia? Jawabnya tak lain melainkan kerana manusia mendapat peluang yang cepat dengan kelazatan. Saya tidak menganggarkan kelazatan dan kemanisan yang tiap-tiap seorang ingin menikmatinya di dalam kehidupannya. Tetapi berenak-enak dengan kelazatan yang sekelip mata dan fana itu adalah pendapat yang salah. Pendapat inilah yang menarik manusia kepada berbagai-bagai malapetaka dan kekusutan.

Inilah punca yang menyebabkan kebinasaan, keruntuhan dan fitnah-fitnah di dalam dunia ini. Kalau tidak ada pemeluk-pemeluk fikiran yang salah ini nescaya tidaklah ada suasana dunia sebagaimana yang kita saksikan hari ini.

Tetapi agama ini, iaitu agama memuja hawa nafsu tidak akan terdaya sama sekali memerintah dunia kita ini, melainkan jika di dalamnya seorang manusia hanya hidup untuk menurut keinginan nafsunya. Sedangkan hakikat yang sebenarnya tidaklah begitu. Kerana didapati berjuta-juta manusia yang hidup di dataran bumi ini, tiap-tiap seorang daripada mereka mempunyai keinginan dan kemahuannya yang bersendirian. Siapa-siapa yang hendak memutarkan (mengelirukan) hakikat ini, dan ingin hidup mengikut kehendak hatinya dan menurut hawa nafsunya maka itu adalah satu kesalahan yang amat besar, nyatah dia telah diperdaya oleh syaitan. Hakikat kesalahan ini tidak akan bertukar menimpa kepada seseorang atau beberapa orang, tetapi natijahnya akan menimbulkan malapetaka, maksiat dan fitnah (kekacauan).

Kebanyakan kita orang-orang Islam telah menganiaya diri sendiri kerana terdorong menurut hawa nafsu. Kita seyogianya menjadi contoh teladan yang sempurna sebagai seorang Muslim yang sebenar-benarnya dalam dunia ini. Kalau tiap-tiap seorang kita menunaikan tanggungjawabnya dengan mengerjakan yang disuruh oleh Allah dan meninggalkan larangannya nescaya hinalah pujaaa hawa nafsu, robohlah kalimah syaitan, dan tinggallah kalimah Allah – (kalimah tauhid yang menjadi umbi agama Islam – P. Q.)

Sebesar-besarnya maksiat dan sekusut-kusut keadaan pada hari ini, ialah orang-orang yang memegang teraju dunia dalam

peranan politik dan ahli cerdik pandai terdiri daripada orang-orang besar pemuja hawa nafsu, yang bercita-cita hendak menghancurkan dunia kerana telah terpedaya dengan keduniaan dan semangat perkauman mereka yang palsu itu.

Percayalah! Bahawa pujaan hawa nafsu itu lebih celaka daripada bom atom, saya rasa tuan-tuan sangat marah dengan sebutan bom atom itu, dan barangkali tuan-tuan menyangka bahawa akan hancurlah seluruh alam kerananya. Tetapi saya tegaskan bahawa tuan-tuan sekalian tidak berhak memarahi bom itu, kerana bukanlah dia yang bersalah, malah yang bersalah ialah pereka-perekanya dan tempat-tempat pengajaran dan kemajuan-kemajuan yang kerananya tercipta bom-bom itu. Merekalah yang sebenar-benarnya bersalah, pengajaran dan kemajuan inilah yang menelurkan perajaan hawa nafsu dan syaitan!

Kitab sejarah untuk sekolah-sekolah

Sudah siap

Sejarah Ringkas

**Muhammad**

*sallā Allahu ‘alayhi wa sallam*

Disusun oleh Edrus. Sejarah

ringkas junjungan kita Muḥammad (S.A.W) yang perlu diketahui terutamanya oleh murid-murid sekolah.

Tiap-tiap bahagian disudahi dengan pertanyaan-pertanyaan yang boleh mengingatkan murid-murid kepada apa yang telah dibacanya. Bahasanya mudah difaham dan disulam dengan peta dan gambar-gambar yang berkenaan dengan sejarah-sejarah itu. Pertama buku sejarah ringkas yang diterbitkan oleh Qalam untuk sekolah-sekolah.

Senaskhah \$1.20

Pos 10 sen.